




# KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 3, No. 6

website: [www.geocities.com/navaldiocese](http://www.geocities.com/navaldiocese)

Enero 2007



Most Rev. Filomeno G. Bactol, D.D.

## Mensahe

“Kasadya ‘ning taknaa, dapit sa kahimayaan . . .”

Ang milabay nga Pasko naghatag kanato ug paglaum sa kinabuhing mahimayaon sa dihang natawo sa atong kinabuhi ang Manunubos. Pinaagi niini, nakaambit kita

sa kinabuhing Diosnon ug naisa kita ngadto sa dapit sa kahimayaan nga maoy hinungdan sa atong kasadya ug pagmaya.

“Bag-ong tuig, bag-ong kinabuhi ..”

Sa atong malipayon nga pagdawat sa bag-ong tuig 2007, giatubang usab nato ang hagit sa pagbag-o sa atong kinabuhi. Sa makadaghan gipahinumduman kita nga ang kristohanong kinabuhi usa ka walay hunong nga proseso sa pagsantos sa atong kaugalingon. Ug ang gasa sa bag-ong tuig usa lamang sa mga paagi diin gipahinumduman kita sa Ginoo sa maong pagbag-o.

“Bulahan O bulahan, ang Simbahan nga giawitan...”

Ang pagbag-o sa kaugalingon kinahanglan magdala kanato ngadto sa pag-alagad sa katilingban, kay makita lamang nato ang kahulugan sa atong kinabuhi kung kini gihalad alang sa kaayohan sa isigka-ingon. Dinhi mosulod ang hagit sa pagbag-oo sa atong katilingban pinaagi sa BEC. Hinaut pa unta nga ang bag-ong tuig maghatag kanato ug bag-ong kadasig diha sa pagpanginlabot nato sa kabag-ohan sa atong katilingban alang sa kabulahanan sa atong Simbahan.

Ning tanan, kami nga mga kaparian nagpasalamat kaninyong tanan sa kanunay ninyong paghatag ug bili sa mga panglantaw sa atong Simbahan ug paghatag ninyo kanunay sa inyong mahigugmaon nga pag-alagad. Kami manghinaut nga ang bag-ong tuig magdala kanato sa dugang pang kadasig sa pagbag-o sa Simbahan ug pagpalambo sa atong katilingban pinaagi sa BEC.

**“MABUNGAHON NGA BAG-ONG TUIG KANATONG TANAN!**

Bishop FILOMENO G. BACTOL, D.D.  
ug mga Kaparian sa Naval



Pamalandong sa  
**EBANGHELYO**

Enero 7, 2007 – DOMINGO SA EIPANIYA SA GINOO  
Basahon : Is 60: 1-6 / Eph 3: 2-3a, 5-6 / Mt. 2:1-12

### Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Ang panahon sa Pasko nagpadayon uban ang lain na usab nga panlantaw sa Dios diha sa atong kasaysayan. Diha sa iyang pagkatawo, si Hesus mao ang nagpadayag sa Dios. Mao kini ang panahon anus-a gisaulog nato ang Batang Hesus, apan mas labaw pa niini ang pagpadayag, ang “epipaniya” sa Dios ngadto sa tibuok kalibutan.

Ang ebanghelyo nagpadilaab sa daghang mga kasingkasing pinaagi sa sugilanon sa tulo ka mga dumuduong sa Bethlehem. Tinultulan sa dan-ag sa bituon, miadto sila paghalad sa ilang mga gasa: bulawan, insenso ug mira. Tinabangan sa unang duha ka mga pagbasa, masabtan nato ang kahulugan niining hamubong yugto. Ang Dios misulod sa atong kasaysayan. Gasa kini alang sa tanan. Posible nga ang tulo ka hari nahiabot sakay sa mga kamelyo gikan sa Midian ug Ephah o nanagdala sila og bulawan ug insenso gikan sa Shebah; apan sila nagtimaangayod nga ang tibuok kanasuran magalakaw diha niining kahayag. Sa karaang Simbahan, nagkahulugan kini nga ang mga Hentil, mga dili-Judio, isipon usab nga mga isigka-manununod uban sa mga Judio kay mga sakop sa mao ra nga lawas.

Ang atong pagkalingaw paghandum ug pagtuki sa misteryo niining adlaw mas labaw pa gayod kay sa paghunahuna mahitungod sa tulo ka hari. Mas mahinungdanon usab nga sutaon gayod kun unsaon paghubad ang Griyegong pulong: “magi”. Kini sila gitawag nga mga hari, mga maalamong tawo, o mga

batid sa kabituopnan sa langit. Sa bisan asang panghitabo, sila nagtimailhan sa adlaw anus-a saulogon ang pagpadayag sa Dios pinaagi ni Cristo Hesus. Sa higayon nga saulogon nato ang Epipaniya, atong giharong ang misteryo ni Cristo ug ang atong tubag diha sa pagtuo.

**Pamalandongi kini:**

1. Diha sa pagsulod sa Dios sa tawhanong kasaysayan siya usab misulod sa atong tagsatagsa ka kinabuhi. Diha sa imong pagkinabuhi, makit-an ba ang Dios?
2. Giunsa man nimo pagtagad ang mga dili nimo isigkamagtutuo? Giisip mo ba silang mga “anak sa gawas” sa ingon dili sila makapanunod sa kaluwasan nga gitanyag kanato sa Dios?

Enero 14, 2007 – Ikaduhang Domingo sulod sa tuig  
 Basahon : Is 62: 1-5 / 1Cor. 12:4-11 / Juan 2: 1-11

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Gidapit si Hesus sa kasal didto sa Cana uban sa iyang inahan ug sa iyang tinun-an. Didto pagahimuon niya ang unang milagro. Si Juan mitaho niining maong milagro aron motuo kita nga si Hesus mao ang Mesiyas, ang Anak sa Dios, ug aron pinaagi sa atong pagtuo, mabuhi kita sa iyang ngalan (Juan 2:30-31)

Abut sa yuta ug ginama sa kamut , ang bino mao ang kinalamiang imnon panahon sa kasal. Ang ka-abundansya sa bino giisip sa mga taga-Israel nga ilhanan sa pag-abot sa kapanahonan sa Mesiyas.

Niining kasaulogon sa kasal giipis ang bino nga maoy nagpahinumdom sa kinalig-onang paghulagway sa relasyon tali sa Dios ug sa tawo nga ingog managtiayon. Panahon sa Epipaniya, ang karaang tradisyon sa Silangang Simbahan nagsaulog og tulo ka mga pagpadayag sa himaya ni Cristo: ang iyang pagpadayag ngadto sa tulo ka maalamong tawo, ang iyang bunyag didto sa Jordan ug ang kasal sa Cana. Busa tukma lang gayod diay nga kining bahina sa Ebanghelyo maoy pagabasahon niining Domingoha.

**Pamalandongi kini:**

- Unsa man ang tubag sa mga pagapadayag sa Dios nimo dinha sa imong kinabuhi?
- Kumusta na man ang imong relasyon ngadto sa Dios, siya nga nakiglambigit kanimo ingog managtiayon?

Enero 21, 2007 – Ikatulo nga Domingo sulod sa Tuig  
 (FEAST OF THE STO. NINO)  
 Basahon : Is. 62:1-5 / 1Cor. 12:4-11 / Juan 2:1-11

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Ang Sto. Nino magpabilin nga tipik sa atong kinabuhi. Ang paghatag natog bili niini nagpadayag lang sa atong tim-os nga relasyon sa Batang Hesus.

Tinuod mahiligon kitag mga bata. Nakadayeg kita sa ilang mga kinaiya ug mga hiyas. Tungod niini ang atong pagtagad sa Batang Hesus mitakdo sa naandang mga kinaiya sa mga bata. Gitaw nato ang kaayo, kalumo og kasingkasing, pagka-inosente



**TEAM MINISTRY**

*Team Moderator:* Bishop Filomeno G. Bactol, D.D.

*Team Members:*

- Fr. Marvyn A. Maceda
- Fr. Florencio Geronas
- Fr. Kenneth Hendricks
- Fr. Cornelio Amante, Jr.

*Newsletter Moderator:*  
Fr. Marvyn A. Maceda

*Encoder:*  
Vinna Sabroso

*Computer Specialist*  
Oscar O. Borrinaga

*Business Managers:*  
Rizalito V. Curso  
Conchita Calvez

**PARISH FORMATION TEAM**

- |                  |                    |
|------------------|--------------------|
| Eudoxia Canonoy  | Reymund Icaín      |
| Linda Roldan     | Jonnel Quilaneta   |
| Necitas Casado   | Alfredo Olaer      |
| Catalina Machete | Alfredo Paghubasan |
| Sonia Pitao      | Danny Jayubo       |
| Josephine Romero | Gualberto Tonelete |
|                  | Ramises Bongabong  |
|                  | Jorge Manco        |
|                  | Buddy Castro       |

ug pagkamatinud-anon sa Batang Hesus mao nga walay puas kitang nagdebosyon kaniya.

Ang larawan sa Sto. Nino nagtug-an kanatog usa ka kamatuoran. Kadaghanan kanato mipili sa batang Hesus kay sa “hingkod” nga Hesus. Kini tungod kay kadaghanan nato dili man gusto nga manginlabot si Hesus sa atong kinabuhi isip usa ka matutudlo sa moralidad. Gusto man god nato ang Hesus nga atong mapangayoan, mamandoan, maparaygan kay siya usa man ka suod nga higala, usa ka manghod nga igsuon, usa ka magtatabang. Dili kita nianang Hesus nga magtuliskok sa atong tanlag.

Kon ingon niini ang atong pagdebosyon kang Senyor Sto. Nino, nan halayo ra kita sa tinuod nga kahulugan sa pagdebosyon. Mao kini ang matuod nga kahulugan sa pagdebosyon kaniya: nga kita mahatod ngadto sa pagsunod sa iyang mga hiyas.

### **Pamalandongi kini:**

Sa imong pagdebosyon kang Senyor Sto. Nino, nagpunay ka na ba lang og pangayo? Wala ka ba mosulay pagpuyo sa iyang mga hiyas?

Enero 28, 2007 – Ikaupat Nga Domingo Sulod Sa Tuig  
Basahon: Jer. 1:4-5, 17-19/1 Cor.12:31-13:13/Luke 4:21-30

### **Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Ang tanang giwali ni Hesus didto sa Nasaret mahimong mub-on niining pipila ka mga pulong: ‘Nga karong adlaw kining bahina sa Kasalutan natuman ingon sa inyong nadungog nga gibasa’ (Lucas 4:21). Ang mga katagilungsod ni Hesus nakiglantugi kaniya tungod sa ilang hiniusang interes nga unta buhaton niya ang unsay iyang gibuhad didto sa Capernaum. Sa dihang naghigot siya mahitungod sa mga dagkong propeta sa karaang panahon nga naghimog dagkong mga milagro alang sa mga dili-Judio, ang iyang mga katagilungsod misulay pagpatay kaniya.

Kining maong hitabo daan nang nagtug-an sa unsa unyay dangatan ni Hesus ug sa iyang mensahe. Tapos sa iyang Paglabang gikan niining kalibutana ngadto sa iyang Amahan, kining maong mensahe mikaylap gikan sa Herusalem ngadto sa Judea ug

sa Samaria ug ngadto sa tibuok kalibutan (buhat 1:8)

Dili nato mahimong bilangoon si Hesus didto sa Nasaret sulod sa iyang panahon tungod kay ang iyang pulong alang man sa matag kaliwat, sa matag kultura, tibuok kalibutan ug sa tanang panahon.

### **Pamalandongi kini:**

Alang kanimo ug sa imong kinabuhi, aduna bay kahulugan si Hesus? Ang iyang mensahe nagtubag ba sa imong mga pangutana sa kinabuhi?

## **PICTORIAL**

### **PARISH & BEC CHRISTMAS GATHERINGS** All BEC's, Religious Movements & Cofradias



# **BEC Activities**

January 6, 2007 (1st Saturday)  
**CLUSTER FELLOWSHIP**  
BEC Ilaya & Brgy. Smo. Rosario  
Lugar: Cathedral Church  
Oras: 8:00 pm. – 10:00 pm.

January 20, 2007 (3rd Saturday)  
**PAROCHIAL FELLOWSHIP**  
Lugar: Upper Biga-a Chapel  
Oras: 7:30 AM. – 3:00 PM.

January 2, 2007 (3rd Sunday)  
**PAROCHIAL FELLOWSHIP**  
Lugar: Brgy. Agpangi Chapel  
Oras: 7:30 AM. – 3:00 PM.

# **BEC Anniversary**

January 10, 2007  
**BEC Ilaya Central**

January 12, 2007  
**BEC Bernardes Village**

January 21, 2007  
**BEC Ilaya South**

January 23, 2007  
**BEC Anislagan**

January 24, 2007  
**BEC Brgy. Caraycaray Zone 1**

January 25, 2007  
**BEC Brgy. Smo. Rosario Zone 3  
&  
BEC Brgy. Villacaneja**

